


東坡全集

內制集四




漢書門				
五	四	五	六	類
二	八	六	九	號
冊	架	函	號	類

內閣文庫			
三	五	五	漢
函		四	書
一	七	八	號
架	冊	六	類

內閣文庫	
番號	漢 5456
冊數	28 (18)
函號	315 84

內制集



此編八十九葉

東坡詩集目錄

卷一

淺草文庫

賜同知樞密院事安燾乞外郡不允批荅二首

賜大遼人使御筵茶藥口宣二首

賜安燾乞外郡不允斷來章批荅口宣

雄州撫問大遼使副口宣

賜尚書右僕射呂公著生日詔

賜皇對祖宗景辭恩命不允詔二首

賜判大名府韓絳乞致仕不允詔二首

趙州賜大遼使副茶藥詔二首

冬至資薦 神宗皇帝齋文

趙州賜大遼使副茶藥詔四首 口宣二首附

賜河西軍節度使阿里骨加恩制告詔

賜交趾郡王李乾順加恩制告敕書

太皇太后祭真故夏國主祭文

賜故夏國主嗣子乾順詔二首

內中添蓋神御殿告遷 御容祝文

集禧觀開啓祈雪道場青詞

內中告遷 神御於新添備殿奉安祝文

故贈太師溫國公司馬光安葬祭文

賜劉昌祚進奉賀明堂禮畢馬敕書

賜知穎昌府韓縝辭免恩命不允詔

班荆館賜大遼人使到闕并回程酒果口宣三首

正旦資薦 神宗皇帝齋文

賜河東諸軍來年春季銀鞋兼傳宣撫問口宣

賜大遼人使回程御筵并銀鈔鑲唾玉等口宣二首

賜判大名府韓絳詔書湯藥口宣

賜韓絳乞致仕不允斷來章詔四首

賜安燾乞退不允詔

賜范鎮赴闕詔

賜外任臣寮曆日詔敕書

賜中書侍郎呂大防辭恩命不允詔

賜刑部尚書蘇頌辭恩命不允詔

賜御史中丞傅堯俞辭免恩命不允詔

賜故夏國主嗣子乾順進奉賀正馬馳回詔二首

皇帝達 太皇太后賀大遼正旦書

皇帝賀大遼正旦書

奏告天地社稷宗廟宮觀寺院祈雨雪青詞齋祝文

五嶽四瀆等處祈雪祝文

賜宰臣呂公著生日禮物口宣

相州賜大遼使副御筵并公路傳宣撫問口宣三首

賜尚書右丞劉摯辭恩命不允斷采章批荅二首

賜大遼人使御筵口宣三首 相州班 荆館

皇帝達 太皇太后迴大遼賀正旦書

皇帝迴大遼賀正旦書

賜判大名府韓絳詔善湯藥口宣

賜呂大防劉摯辭免恩命不允斷采章批荅口宣三首

班荆館賜大遼入使赴關口宣

第二卷

奏告 永裕陵并酌獻表本八首

賜知河南府孫固乞致仕不允詔四首

撫問熙河蘭會路臣寮口宣

在京諸宮觀開啓 神宗皇帝大祥道場齋文

撫問知揚州王安禮口宣

賜尚書左丞李清臣生日詔

景靈宮奉安 神宗皇帝御容祝文

垂拱殿開啓 神宗皇帝大祥道場齋文

賜皇太后祖安康郡王宗隱生日禮物口宣

天章閣權奉安 神宗皇帝御容祝文

賜皇太后祖華原郡王宗愈生日禮物口宣

內中福寧殿寒節為 神宗皇帝作水陸道場齋文

賜皇太后祖漢東郡王宗瑗生日禮物口宣

內中神御殿奉安 神宗皇帝御容并別祭祝文二首

寒節就驛賜于闐國進奉人御筵口宣

賜知定州韓忠彥乞改一偏州不允詔

賜兵部尚書王存乞知陳州不允詔

奉安 神宗皇帝御容赴景靈宮導引歌詞

景靈宮奉安 神宗皇帝御容祝文青詞朱表齋文四首

賜御史中丞傅堯俞乞外郡不允詔

五嶽四清等處祈雨祝文

賜集禧觀使韓絳茶藥詔

賜保寧軍節度使馮京告敕茶藥詔

賜韓絳赴闕詔二首

賜馮宗韓絳告敕詔書茶藥口宣二首

相國寺集禧觀開啓祈雨道場齋文青詞二首

賜故夏國主嗣子乾順進奉謝恩馬馳回詔

諸宮觀寺院等處祈雨青詞齋文

天地社稷宗廟神廟等處祈雨祝文

賜太師文彥博乞致仕不許不允批荅二首

賜宰相呂公著乞退不許不允批荅二首

口宣二首附

賜刑部侍郎范百祿乞外任不允詔

賜交州進奉人朝見訖就驛御筵口宣

賜知秦州呂公孺乞改授宮觀小郡差遣不允詔

故聽宣劉氏祭文一首

五嶽四瀆等處祈雨謝雨祝文二首

鄭州超化寺祈雨謝雨齋文二首

景靈宮罷散奉安 神宗皇帝御容道場功德疏文

賜外任臣寮進奉興龍節馬詔敕書

賜判大宗正事宗晟上表乞還職事不許不允詔二首

永裕陵脩移角堦等奏告 神宗皇帝祝文

土地祝文附

白溝驛賜大遼人使御筵兼傳宣撫問口宣

第三卷

賜尚書左丞李清臣乞退不允不許批荅二首

賜文彥博以下請御正殿復常膳不允不許批荅二首

集禧觀洪福殿等處罷散謝兩道場青詞齋文附朱表

賜李清臣乞退不允批荅口宣

賜溪洞蠻人彭允宗等進奉端午布敕書

賜韓絳到闕生餽口宣

神宗皇帝禪祭祝文三首

賜文彥博以下請御正殿復常膳允許批荅二首

景靈宮開淘井眼祭告里域真官祝文

賜尚書左丞劉摯辭免恩命不允詔

賜尚書右丞王存辭免恩命不允詔

賜皇伯祖高密郡王宗晟生日禮物口宣

班荆館賜大遼人使到闕御筵口宣

賜吏部侍郎傅堯俞辭免恩命乞知陳州不允詔

賜濟陽郡王曹佾生日禮物口宣

賜王存辭免恩命不允不許斷來章批荅二首

賜文彥博以下請舉樂不許不允批荅四首

賜文彥博等請太皇太后受冊不許批荅

賜韓絳乞致仕不允詔二首

賜同知樞密院事范純仁生日詔

賜文彥博以下請舉樂不許不允批荅二首

賜文彥博等請 太皇太后受冊許批荅

賜大遼使副銀鈔羅錦被褥等口宣

賜吏部侍郎范百祿辭免恩命不允詔

賜皇對楊王顯生日禮物口宣

相州賜大遼人使却回御筵口宣

賜外任臣寮進奉坤成節銀敕書

雄州撫問大遼使副口宣

賜知樞密院安燾辭免恩命不允詔

賜皇弟似生日禮物口宣

賜安燾辭免恩命不允斷來章批荅二首口宣

賜權陝漕孫路知蘭州王文郁銀絹獎諭敕書二首

賜守司空致仕韓絳辭免恩命不允批荅二首

瀛州賜大遼人使回程御筵口宣

賜安燾以下罷散坤成節御筵口宣

玉津園賜大遼人使射弓例物并生餼酒果口宣三首

賜文彥博安燾以下罷散坤成節道場香酒果口宣三首

坤成節賜于闐國進奉人御筵口宣

賜燕達以下罷散坤成節道場香酒果口宣

賜皇伯祖宗暉等罷散坤成節道場香酒果口宣三首

賜南平王李乾德制誥敕書

班荆館賜大遼人使回程酒果口宣

皇帝達 太皇太后迴大遼賀坤成節書

皇帝迴大遼問候書

三宮受冊奏告太廟并訶陵祝文

三宮受冊奏告景靈宮等慶書詞

賜前兩府并待制以上知州初冬衣襖詔

賜諸路知州職司并幕官等初冬衣襖敕書二首

賜諸路之駐劄諸官等初冬衣襖都敕

西京會聖宮告遷諸神并奉安祝文二首

賜西南羅蕃進奉敕書

第四卷

賜熙河秦鳳帥臣監司等銀合兼傳宣撫問口宣二首

賜知永興軍韓縝茶銀合兼傳宣撫問口宣

賜皇弟祚國公偲生日禮物口宣

賜戶部尚書李常乞除法邊一州不允詔

賜文彥博呂公著入朝免拜詔

賜呂公著乞罷相位除外任不允批荅口宣二首

賜兼侍讀蘇頌辭免恩命不允詔

迎奉 神宗皇帝御容赴會聖宮奉安導引歌詞

劄子 論文彥博呂公著詞免不拜恩命事

賜太師文彥博辭免不拜恩命許允批荅二首

賜呂公著乞罷相位不允斷來章批荅口宣三首

賜韓絳乞受冊禮畢隨班稱賀免赴詔

賜呂公著乞罷免相位不允詔

賜皇弟威寧郡王侯生日禮物口宣

賜文彥博辭免入朝拜禮允批荅口宣

生獲鬼章文武百寮稱賀宣荅詞二首

批荅宰臣以下賀生獲鬼章表二首

賜皇弟荆王頴生日禮物口宣

賜呂公著辭免不拜恩命允許批荅二首

賜种誼以下銀合茶藥及撫問稿設將校口宣

賜建安郡王宗綽生日禮物口宣

撫問劉舜卿兼賜孫路游師進銀合茶藥口宣三首

西京會聖宮奉安 神宗皇帝御容奉安 諸帝祝文

西京會聖宮奉安 神宗皇帝御容奉安 諸帝祝文

生擒西蕃鬼章奏告 永裕陵祝文

賜文彥博乞致仕不允不許斷來章批荅口宣并詔八首

十月一日永裕陵開啓資薦 神宗皇帝道場齋文
撫問秦鳳等路臣寮口宣

會聖宮奉安 神宗皇帝御容禮畢開啓道場齋文
白溝驛傳宣撫問大遼人使及賜御筵口宣

奉安 神宗皇帝御容前一日奏告 永裕陵祝文
汧路撫問奉安 神宗皇帝御容禮儀使以下口宣三首

鄭州鞏
縣西京

賜嗣濮王宗暉生日禮物口宣

永裕陵十月旦表

奉安 神宗御容禮畢相賜禮儀使以下御筵口宣

賜工部侍郎蔡延慶乞知應天府不允詔

賜外任臣寮等進奉坤成節功德疏詔教書

賜通判梓州趙君奭進奉坤成節無量壽佛教書

趙州賜大遼使副茶藥詔二首

神宗皇帝御容至會聖宮前一日奏告諸帝祝文

十月朔 永裕陵酌獻表本

賜熙河路副總管姚兪等銀合茶藥口宣

賜尚書左丞劉摯生日詔

第五卷

神宗御容進發前一日奏告諸宮觀寺處青詞

神宗御容進數前一日奏告天地社稷宗廟等處祝文

賜涇原路經略使并漢蕃使臣以下銀合茶藥等口宣

賜太師文彥博生日詔

賜大遼人使白溝驛御筵并撫問口宣

賜知成都府王安禮乞知陳穎等一郡不允詔

皇帝達 太皇太后賀大遼生辰書

皇帝賀大遼生辰書

賜奉安 神宗御容禮儀使吕大防銀合茶藥詔

賜奉安 神宗御容押班馮宗道等銀合茶藥敕書附口宣

三宮受冊禮畢奏謝天地等青詞齋祝文祭諸神廟祝文附

隆祐宮設慶宮醮青詞

賜太師文彥博生日禮物口宣

賜南平王李乾德曆日敕書

永裕陵十二月旦表本

皇帝達 太皇太后賀大遼正旦書

皇帝賀大遼正旦書

冬季傳宣撫問諸路沿邊臣寮口宣

賜龍圖閣直學士陳安石辭免恩命不允詔

賜知成都府王安禮銀合茶藥詔

撫問河南知府永興知軍陝漕使副口宣二首

內中御待以下賀冬至詞語三首

賜知成都府王安禮銀合茶藥兼傳宣撫問口宣

賜皇弟遂寧郡王佖生日禮物口宣

賜大遼使副茶藥并撫問口宣三首趙州

元祐三年春貼子詞二十七首

皇帝回大遼賀興龍節書

皇帝達 太皇太后回大遼問候書

賜宰相呂公著生日詔附宣

冬季撫問諸路公邊臣寮口宣

賜于闐國進奉人進教前一日御筵口宣

賜外任臣寮曆日敕詔書

班荆館賜大遼人使御筵酒果口宣三首

賜五臺山十寺僧正省奇等獎諭敕書

相州賜大遼人使御筵口宣

賜諸路臣寮春季銀鞋兼撫問口宣

撫問知大名府馮京口宣

賜大遼使副鈔鑼等并御筵口宣二首

賜外任臣寮進奉興龍節馬敕書

賜安燾苗授罷散興龍節道場香酒果口宣二首

賜太師文彥博以下罷散興龍節酒果口宣

賜大遼人使內中酒果并御筵口宣四首

賜寶文閣直學士李之純辭恩命不允詔

賜大遼人使朝辭歸驛酒果口宣

賜皇伯祖宗暉以下罷散興龍節道場香酒果口宣

賜大遼人使射弓例物口宣

賜皇弟普寧郡王似生日禮物口宣

第六卷

賜大遼人使班荆館却回酒果口宣

永定院脩蓋舍屋奏告 諸帝后祝文土祝

賜于闐國黑汗王進奉賀登位并示諭教書二首

賜諸路臣寮中冬衣細口宣

賜外任臣寮進奉賀 三宮受冊馬詔敕二首

賜知大名府馮京進奉賀端午節馬詔

賜知鄧州韓維并郭述等進奉謝恩馬詔二首

賜溪洞彭儒武等進奉興龍節溪布敕書

送伴回程與大遼賀正旦人使相逢撫問口宣

趙州賜大遼使副茶藥詔四首口宣一首附

相州賜大遼使副御筵口宣二首

賜皇伯祖宗晟等罷散興龍節道場香酒果口宣四首

內中御侍以下賀年節詞語三首

賜大遼人使御筵酒果宴花銀鈔羅生餼等口宣八首
賜太師文彥博乞致仕不許不允詔二首

送伴沿路與此朝生辰等使副相逢傳宣撫問口宣
賜大遼使副酒果御筵春幡勝射弓例物口宣八首

皇帝回大遼賀正旦書

皇帝達 太皇太后回大遼賀正旦書

永安陵等忌辰奏告 諸帝后表本二首

皇太后殿內人為 神宗皇帝忌辰朝永裕陵表本

西京奉安 神宗皇帝御容禮畢西京德音

賜尚書右丞王存生日詔

瀛州賜大遼人使回程御筵口宣

賜戶部侍郎趙瞻陳乞便郡不允詔

賜潞州總管王寶進奉戀闕并到任馬敕書

賜知大名府馮京進奉興龍節并冬至正旦馬詔

賜外任臣寮進奉謝恩馬詔敕

賜外任臣寮進奉興龍節功德疏詔敕

賜宰相呂公著乞致仕不允不許斷來章批荅口宣六首

除呂公著守司空同平章軍國事制

除呂大防守尚書左僕射制

除范純仁守尚書右僕射制

第七卷

賜呂公著呂大防范純仁辭免恩命不允詔三首

賜知乾寧軍內殿承制張赴獎諭救書

宣詔許內翰入院口宣

賜知永興軍韓績乞致仕不允謝來章詔二首

賜范純仁再上劄子辭免恩命不允詔

賜中書侍郎劉摯辭免恩命不允詔

賜尚書左丞王存辭免恩命不允詔

賜尚書右丞胡宗愈辭免恩命不允詔

賜簽書樞密院事趙瞻辭免恩命不允詔

賜門下侍郎孫固辭免恩命不允詔

劄子論女蒸詞
遷官恩命事

賜安燾胡宗愈趙瞻辭免恩命不允詔三首

賜安燾辭免遷官恩命允詔

賜胡宗愈辭免恩命不允詔

賜呂公著呂大防范純仁辭免恩命不允劄來章批

荅口宣一十六首

賜孫固劉摯王存胡宗愈趙瞻辭免恩命不允劄來章

批荅口宣一十五首

閣門賜新除守司空同平章軍國事呂公著告口宣

閣門賜新除宰相呂大防范純仁告口宣

賜呂公著辭免冊禮許先詔二首

賜御史中丞孫覺辭免恩命不允詔

賜翰林學士知制誥許將赴闕詔

賜許將辭免恩命不允詔

賜河北西路諸軍秋季銀鞋兼傳宣撫問臣寮將校口宣

白溝驛賜大遼人使御筵兼傳宣撫問口宣

第八卷

元祐三年端午賜子詞二十七首

賜大遼人使生瀛口宣

賜龍圖閣待制傅堯俞辭免恩命不允詔

故皇妣祖漢東郡王宗瓌祭文二首

賜尚書右丞胡宗愈乞除閑慢差遣不允詔

賜知樞密院事安燾乞退不允不許批荅口宣三首

後苑瑤津亭開啓祈雨謝雨道場齋文二首

永裕陵月旦表本五首

賜尚書右僕射范純仁生日詔

賜北京脩河官吏等銀合茶藥兼傳宣撫問口宣

賜阿知大名府馬京兼賜銀合茶藥口宣

賜西蕃龜川首領阿里骨進奉回詔

賜尚書左僕射呂太防生日禮物口宣

賜皇弟大寧郡王佖生日禮物口宣

賜門下侍郎孫固生日詔

賜知樞密院事安壽生日詔

賜五臺山十寺僧正省奇以下安諭教書

玉津園賜大遼人使射弓例物口宣

賜殿前司罷散坤成節道場香酒果口宣

賜宗室罷散坤成節道場香酒果口宣

賜大遼人使宴花酒果御筵口宣五首

太皇太后賜門下手詔

賜馬步軍司罷散坤成節道場香酒果口宣

賜安壽以下罷散坤成節道場香酒果口宣

賜嗣濮王揚玉罷散坤成節道場香酒果口宣二首

除舊授殿前副都指揮使制

賜文彦博以下罷散坤成節道場香酒果口宣

賜大遼人使御筵口宣二首 相州瀛州

賜曹佺罷散坤成節道場香酒果口宣

班荆館賜大遼人使回程酒果口宣

西嶽廟開啓祈雨道場青詞

奉宸庫翻脩聖宇等庫了畢安慰土地道場齋文

賜苗授辭免恩命不允 斷來章批荅口宣二首
賜于闐國黑汗王進奉敕書三首

賜皇對徐王辭免恩命不允 斷來章批荅口宣
示諭武泰軍官吏軍人僧道百姓等敕書

中太一宮真室殿開啓天皇元曜道場青詞

第九卷

中太一宮真室殿罷散道場朱表

顯聖寺開啓 太皇太后消災集福祿壇道場齋文
後苑瑤津亭開啓祈雨道場齋文

閤門賜新除徐王告口宣

皇對故魏王祭文三首

賜徐王顯辭免冊禮允許詔二首

賜太師文彦博乞致仕不允批荅口宣三首

賜知太原府曾布乞除一閑慢州郡不允詔

故尚宮吳氏墳所祭文

西路闕雨濟河淮瀆廟祈雨祝文

撫問秦鳳路臣寮口宣

除皇伯祖宗晟特起復制

賜皇伯祖宗晟辭免恩命不允 斷來章批荅口宣二首
相州賜大遼使副御筵口宣

賜知渭州劉昌祚進奉興龍節銀詔

相州賜大遼人使回程御筵口宣

樞問知大名府馮京口宣

冬季傳宣樞問河北東路沿邊臣寮口宣

賜知渭州劉昌祚進奉謝恩及賀端午節馬詔

內中御侍以下賀冬至詞語三首

賜安燾李瑋苗揆姚麟罷散興龍節道場香酒果口宣四首

賜宗晟辭免起復恩命不允詔二首

賜知鄧州蔡確乞量移弟碩允詔

興龍節尚書省賜宰相以下酒果口宣

賜大遼使副鈔鑼酒果御筵茶藥口宣九首

王津因趙州

莊升班荆館

賜宗晟辭免起復恩命不允詔二首

賜文彥博安燾以下罷散興龍節道場香酒果口宣二首

賜徐王等罷散興龍節道場香酒果口宣四首

賜大遼人使酒果生餼御筵口宣五首

故渭州防禦使宗孺祭文二首

賜皇弟普寧郡王似生日禮物口宣

雄州樞問大遼賀正旦人使口宣

賜西蕃邀川首領阿里骨進奉回程詔

皇帝回大遼賀興龍節書

皇帝達 太皇太后回大

劄子 諭宗晟 請免起復恩

賜宗晟辭免起復恩命不

第十卷

賜吏部侍郎傅堯俞乞外

太皇太后賜門下手詔

賜宗晟辭免起復恩命許

賜端明殿學士范鎮獎諭

賜知大名府馮京進奉賀冊

賜知相州李珣進奉賀冬匡

賜知熙州劉舜卿進奉賀冬馬敕書

賜大遼人使御筵酒果口宣三首

賜于闐國進奉人御筵口宣

賜外任臣寮進奉興龍節馬詔敕書

賜大遼人使回程御筵并銀鈔鑼等口宣二首

皇太妃慶宮閣開啓道場善詞

賜大遼人使射弓例物御筵酒果口宣四首

王津園 瀛州 班荆館

賜尚書左丞王存生日詔

賜權知開封府呂公孺乞致仕不允詔二首

撫問廊廡延路臣寮口宣

賜吏部尚書蘇頌乞致仕不允詔二首

賜濟陽郡王曹佺寬假將理詔

賜西南蕃莫世忍等進奉敕書

景靈宮開啓 神宗皇帝忌辰道場齋文

賜吏部尚書蘇頌乞致仕不允詔二首

東太一宮翻修殿宇奏告十神太一真君祝文

故尚服劉氏祭文二首

撫問廊廡延路臣寮口宣

賜禮部尚書梁燾辭免恩命不允詔

賜馮京乞依職任官例祗赴六參不允詔

賜左僕射呂大防生日詔口宣附

賜皇弟徐王顥生日禮物口宣

賜大遼人使銀鑼等口宣

賜翰林學士趙若若辭免國史脩撰不允詔

賜皇弟大寧郡王佖生日禮物口宣

賜五臺山十寺僧正省竒等獎諭敕書

賜太師文彥博溫谿心馬詔

班荆館賜大遼國信使副到闕酒果口宣

賜姚麟以下罷散坤成節道場香酒果口宣

賜大遼使副生餼御筵并射弓例物口宣三首

賜駙馬都尉等罷散坤成節道場香酒果口宣四首

賜大遼人使御筵時花酒果口宣二首

坤成節尚書省賜宰臣以下御筵酒果口宣

皇帝達 太皇太后迴大遼賀坤成節書

皇帝迴大遼問候書

坤成節賜韓忠彥以下御筵酒果口宣

賜徐王罷散坤成節道場香酒果口宣

賜大遼人使朝辭回程御筵口宣二首

賜宰相呂大防以下罷散坤成節道場香酒果口宣

賜大遼使副酒果口宣二首

賜阿里骨進奉人使御筵口宣

瀛州賜大遼人使迴程御筵口宣

賜于闐國進奉人使御筵口宣

班荆館賜大遼人使迴程酒果口宣

賜夏國王進奉賀坤成節回詔

東坡內制集目錄

樂語附

坤成節集英殿宴教坊詞

集英殿秋宴教坊詞

興龍節集英殿宴教坊詞

欽宸殿正旦教坊詞

興龍節集英殿宴教坊詞

東坡內制集卷第一

賜正議大夫同知樞密院事安燾乞外郡

許批荅元祐元年十月八日

覽表具之。卿以應務之才居本兵之地。綏靜中外。人無間言。何疑上章欲求去位。未喻厥意。聞之。憮然。夫榮親莫大於功名。養志不專於甘旨。而況觀闕之下。父母之邦。退食問安。孰便於此。勉循其舊。以卒輔予。賜安燾乞外郡不允。批荅元祐元年十月八日。省表具之。夫事親者不擇地而安之。孝之至也。而況艱難之際。一日萬幾。冰淵之懼。當務同濟。卿練達兵

要灼知邊情寄託之深義難引去亟求自便朕何賴焉

賜正議大夫同知樞密院事安燾乞退不允

批荅口宣元祐元年十月十日

有敕卿被遇先帝勤勞有年逮于眇躬倚注彌重宜安厥位毋重力詞

雄州白溝驛賜大遼賀正旦人使御筵口宣

元祐元年十一月

有敕卿等遠馳使節來慶春朝屬歲律之凝嚴涉道塗之脩阻宜頒宴衍以勞勤劬

趙州賜大遼賀興龍節人使茶藥口宣元祐元年六月

有敕卿等遠訪使輶來陳慶幣川塗甚阻風霧可虞特示至恩往頒名劑

賜正議大夫同知樞密院事安燾乞外郡不

允斷來章批荅口宣元祐元年十一月十六日

有敕卿職在樞要表儀百官進當以禮退當以義今茲求退其義安在亟還視事毋復固詞

雄州撫問大遼國賀興龍節使副口宣元祐元年六月

元祐元年六月

有敕。卿等遠犯風埃，久勤輶傳，入疆茲始，授館少安。申命撫存，式昭眷獎。

賜金紫光祿大夫守尚書右僕射兼中書侍

郎呂公著生日詔

元祐元年十月二十七日

敕公著卿將相三世輔翼，兩朝方斯，千獻夢之辰，有既醉太平之福，宜膺慶賚，永錫壽康。今賜卿生日羊酒米麵等具，如別錄，至可領也。

賜皇妣祖建雄軍節度觀察留後同知大宗

正事宗景上表辭恩命不允詔

元祐元年十月九日

敕宗景省所上表辭免恩命事，具悉。朕初執珪幣，祇

見上帝，嘉與百辟，微福文考，大賚四海，始于親賢，皆神之休，義不當避，國有常典，爾無固詞。

賜皇妣祖宗景上表辭恩命不許詔

元祐元年十月九日

敕宗景覽所上表辭免恩命事，具悉。國家有大祭祀，必均慶賞，邦甸侯衛，燁炮翟闈，無有速迓，畢蒙惠澤，矧我懿親，實維頭相，祇率舊典，毋須固詞。

賜鎮江軍節度使檢校太傅開府儀同三司

上柱國康國公判大名府韓絳上表乞致仕

不許詔

元祐元年十月二十日

敕韓絳覽所上表陳乞致仕事具悉卿四世元老國
之長城端笏垂紳不動聲氣風采所及自然折衝軒
冕丘園其實何異矧今艱難之際自有冰淵之虞黃
髮在廷未敢言病豈宜獨善遽欲即安尚分北顧之
憂勿起退歸之念強食自輔體我至懷

賜韓絳上表乞致仕不允詔

元祐元年十月二十日

敕韓絳省所上表陳乞致仕事具悉功成身退人臣
之常壽考康強有不得謝卿出入將相垂三十年豈
以小物尚勤元老徒得君重計護一方便吏民瞻師
尹之儀刑蠻夷識漢和之風采丘園之請朕未欲聞

其省思慮時寢食親近慈餌以副中外之望

趙州賜大遼賀興龍節大使茶藥詔

敕卿肅將慶幣遠涉川涂風埃浩然徒馭勤止宜加
寵錫以示眷懷

趙州賜大遼賀興龍節副使茶藥詔

元祐元年十月

敕卿將命夙興犯寒遠涉駕言未息軫念殊深特致
恩頒以嘉勤瘁

冬至福寧殿作水陸道場資薦

神宗皇帝

齋文

伏以聖神陟降釋梵後先適更來復之辰茂薦往生之福虔備淨供仰導真游

趙州賜大遼賀正旦副使茶藥詔元祐元年十月十九日

敕卿抗旌出境夙駕在塗眷言跋涉之勞宜適興居之節式頒良劑以輔至和

趙州賜大使茶藥詔元祐元年十月十九日

敕卿遠飭使軺講備隣好蒙犯風霧跋履山川宜頒錫於珍芳庶輔安於寢食

趙州賜大遼國賀 太皇太后正旦大使茶

藥詔元祐元年十月十九日

敕卿恭講隣歡遠勤軺馭言念驅馳之久適丁寒沍之辰宜錫珍良式昭眷寵

趙州賜副使茶藥詔元祐元年十月十九日

敕卿遠持使節來慶春朝方此沍寒良勤啓慶宜示眷懷之異式頒劑和之良

趙州賜大遼國賀 太皇太后正旦使副茶

藥口宣元祐元年十月十八日

有敕卿等奉將邦幣馳會歲元眷言夙駕之勤方次中塗之館宜頒靈劑以喻至懷

趙州賜大遼國賀 皇帝正旦使副茶藥口

宣元祐元年十月二十八日

有敕卿等逖備隣好方次州封言念沍寒想勤跋履特頒名劑以示眷懷

賜新除檢校太保依前河西軍節度使阿里

骨加恩制告詔元祐元年十月十五日

敕阿里骨朕涓選靈辰奉承宗祀肆均介福徧暨多方卿世撫侯封夙虔朝命特加寵渥用獎忠嘉

賜新除依前交趾郡王李乾德加恩制告敕

書元祐元年十月十五日

乾德朕躬執珪幣大饗 帝親盼布湛恩徧暨諸

夏卿世綏侯服欽順朝廷宜錫徽章以昭異數

太皇太后祭真故夏國主祭文元祐元年十月十六日

乃眷外臣嗣守西服襲累世之忠順荷 先朝之寵

光惟天難忱錫命不永訃音遽至閔悼良深特遣使

車往陳奠幣庶此恩禮貫于幽明

太皇太后賜故夏國主嗣子乾順詔元祐元年十月十六日

六月十日

念爾守邦藐然在疚日月逾邁祖塋有時緬懷孝愛之深想極攀踊之戚往助襄事式昭異恩

太皇太后賜故夏國主嗣子乾順詔元祐元年十一月十一日

六月十日

惟我列聖眷爾有邦非徒極其寵榮蓋亦同其憂患念爾哀疚惻然顧懷臨遣行人往喻至意且致奠賻之禮以為存沒之光

內中添蓋 諸帝后神御殿告遷御容權奉安於慈氏殿祝文

於皇神考肇啓闕祠方增築之未寧懼格思之有瀆別嚴淨宇祇奉睟容式燕聖靈永綏慈嘏

集禧觀開啓祈雪道場青詞

伊以麥將覆塊雪未掩塵嗣歲之憂下民安訴具嚴法會祇款闕宮仰冀同雲溥滋新臘

內中慈氏殿告遷 神御於新添脩殿奉安祝文

伏以增築告成闕嚴有英儼衣冠之來復愾歎息之疑聞昭格穆清永綏燕翼

故贈太師追封溫國公馬光安葬祭文

嗚呼元豐之末天步惟艱社稷之衛中外所屬惟是一老屏子一人名高當世行滿天下措國於太山之安下令於流水之源歲月未周綱紀略定天若相之

又復奪之。殄瘁不哀。古今所知之者。神考用之者。聖母馴致其道。太平可期。長為宗臣。以表後世。往奠其葬。庶知予懷。

賜侍衛親軍馬軍都虞候劉昌祚進奉賀明堂禮畢馬敕書。元祐元年十月十日

敕劉昌祚。大事告成。多方同慶。汝以分符之重。特備效馬之儀。載念勤誠。不忘嘉歎。

賜觀文殿大學士知穎昌府韓頊上表辭免。

恩命不允。詔。元祐元年十一月二十五日

敕韓頊。朕躬祀總章。始行嚴配。推廣帝親之澤。羣

及中外之臣。惟我老成。逮受顧命。均此介福。非朕敢私國之故。常毋煩謙避。

班荆館賜大遼賀興龍節人使到闕酒果口

宣。元祐元年十一月初一日

有敕卿等。肅將信幣。來慶誕辰。眷言行李之勞。宜有燕休之賜。受茲芳旨。體我眷懷。

就驛賜大遼賀興龍節人使迴程酒菓口宣。

元祐元年十一月二十四日

有敕卿等。抗旌旋復。弭節少留。風埃浩然。徒馭勤心。宜有珍芳之賜。以昭眷寵之殊。

班荆館賜大遼賀正旦人使迴程酒果口宣

元祐元年十二月二十八日

有敕卿等遠會春朝恪修隣好既卒聘事豈無燕私宜就錫於加籩蓋式昭於異數

正旦於福寧殿作水陸道場資薦 神宗皇

帝齋文

伏以弃黃屋以上賓莫追風馭抱烏蹄而永慕再歷春朝敢仗勝緣式開淨供仰頌義堯之德永追梵釋之游

賜河東路諸軍來年春季銀鞋兼傳宣

臣寮將校口宣 元祐元年十月七日

有敕卿等從事邊陲服勤師律方踐更於春令諒率履於大和特有匪頒以昭眷遇

檜州賜大遼賀正旦人使迴程御筵口宣 元祐元年十二月六日

有敕卿等出疆繼好已事言還跋履冰霜憇休館舍宜有燕私之寵以旌來往之勤

就驛賜大遼賀正旦人使銀鈔羅罽于孟于子

錦被褥等口宣 元祐元年十一月十六日

有敕卿等遠持信幣來慶春朝眷言行李之勞方茲

舍館之宜加頒賚用示寵嘉

賜鎮江軍節度使判大名府韓絳詔書湯藥

口宣

元祐元年十月九日

有敕卿德望之隆中外所屬誠請雖極與論未安毋復懷歸以勤北顧特頒良劑以輔至和

賜鎮江軍節度使判大名府韓絳上第二表

乞致仕不許詔

元祐元年十一月二十九日

敕韓絳為國無強於得人用人莫先於求舊雖已挂冠而謝事尚俾安車而造朝豈有體力不衰蕃宣所寄亟圖自便遂欲言歸矧卿德望並隆神人所相焉

有滿盈之懼夫何倚伏之虞尚體至懷少安厥位

賜韓絳上第二表乞致仕不允詔

元祐元年十一月十四日

敕韓絳朕以眇躬求助諸老皆以艱難之際不詞中外之勞胡為累章確守歸意豈朕不善西伯之養而無人子思之側乎三復喟然未喻厥指朕意不易卿其少安

賜韓絳上第三表乞致仕不許斷來章詔

元祐元年十一月十四日

敕韓絳君臣之義憂樂同之苟皆懷歸誰任其事卿

之高識雅度輕軒冕而樂丘園天下所知也獨不念先帝託付之重乎勉徇大義勿復以言

賜韓絳上第三表乞致仕不允斷來章詔

敕韓絳功成身退人臣之常禮至於非常之遇則必有無窮之報朕待卿於形器之表而卿自處於繩墨之內未為得也朕意不易卿無復辭

賜正議大夫同知樞密院事安燾乞退不允

詔元祐元年七月十三日

救安燾卿才當其位義不詞勞內之樞機之謀外之疆場之議既當其任其責難以家事為詞而況並奉

君親兩全忠孝進無不得出以何名卿之所求固非

矯激朕之不許亦豈空文出還厥官無煩朕命

賜新除落致仕依前光祿大夫范鎮赴闕詔

元祐元年十月二十日

敕范鎮夫有德君子以精神折衝譬之麟鳳能服猛鷲朕虛懷前席以致諸老非敢必以事諉也苟得黃髮之叟皤然在位則朝廷尊嚴茲究消伏卿雖篤老乃心王室母憚數舍之勞以副中外之望

賜外任臣寮曆日以敕書元祐元年十一月十八日

敕韓絳朕申命日官逆推嗣歲眷予共理頒此成書

勉劬農功母違時令

賜新除依前中大夫守中書侍郎呂大防辭

恩命不允詔元祐元年十一月四日

敕大防卿敷大直方任重道遠擢貳西省蔽自朕心雖與聞政事為日未久而歷試中外勤勞百為蓋有年矣德位惟允人無間言亟服新命母煩朕訓

賜新除依前光祿大夫刑部尚書蘇頌辭恩

命不允詔元祐元年十一月七日

敕蘇頌卿篤於仁心深於經術用心司寇期於無刑朕惟孝處之深三年不奪其志又惟才難之故千

以待其來卿而不能誰當能者亟服乃事母煩力詞

賜新除御史中丞傅堯俞辭免恩命不允詔

元祐元年十一月六日

敕堯俞詩云剛亦不吐柔亦不茹朕以卿有樊仲之風是以擢卿為中執法才難之歎古共之豈以小嫻而廢大任與其拘文以自疑不若置已而行義亟服乃事無煩固詞

皇帝賜故夏國主嗣子乾順進奉賀正馬駝

回詔元祐元年十一月二十四日

詔故夏國主嗣子乾順遠奉王正來歸時事惟此充

庭之實率皆任土之宜乃春忠勤良深嘉歎

太皇太后賜故夏國主嗣子乾順進奉賀正

馬馳回詔

元祐元年四月十二日

詔故夏國主嗣子乾順述臨春朝歸誠宰極修此效
牽之視致其乘服之良再闕未章式嘉忠節

皇帝達

太皇太后賀大遼正旦書

元祐元年十月

肇易歲元發新榮於萬物仰溥慈誨修舊好於兩

朝遠飭使軺肅將禮幣庶迎壽祉式副願言

皇帝賀大遼皇帝正旦書

元祐元年十月

歲發春共講

三朝之慶寶隣以好茂膺五福之

祥申飭使車往陳信幣永言報禮且以罄論陳

奏告天地社稷宗廟宦觀寺院等處祈雨雪

青詞齋祝文

伏以暮年以來水旱作沴迨茲徂歲復苦常陽疫

將興農末俱病方齋居而默禱庶精意之登聞敢祈

春臘之交沛然雨雪之賜願均介福敷錫群生

五嶽四瀆等處祈雪祝文

伏以歷冬不雪兩歲之憂疾癘將興麥蕪就稿分命

守土告于有神下民其咨天聽不遠母愛同雲之澤

以成盈尺之祥苟利于民敢忘其報

賜宰臣呂公著生日禮物口宣元祐元年十月十六日

有敕朕之元老生以茲辰實為邦國之華豈獨閨門之慶故命爾恩徃宣余懷仍分廐庫之良以助子孫之壽

相州賜大遼國賀興龍節使副御筵口宣元祐元年十月十八日

有敕卿等遠馳信幣來慶誕辰眷言四牡之勞宜享加邁之禮式頒寵數以示至恩

送伴正旦使副沿路與賀北朝生辰并正旦

使副相見傳宣撫問口宣元祐元年十月九日

有敕卿等方冬出使涉春在途遠犯風埃想勤跋履勉加鞭策即造會朝

賜大遼賀正旦人使正月六日朝辭訖就驛

御筵口宣元祐元年十二月二十五日

有敕卿等來備舊好克備多儀既陞見以告辭將駕言而反命載嘉勤勩宜錫燕私

賜新除中大夫守尚書右丞劉摯辭恩命不許斷來章批荅元祐元年十一月

覽表具之道有行歲時有用捨歲不我與難以智求

道之將行豈容力避大言大利固當安而受之小行
小廉非所望於卿者成命不再可無復辭

賜劉摯辭免恩命不允斷來章批荅元祐元年十月

省表具之政如農耕以既獲為能事言如藥石以愈
疾為成功若耕不獲疾不愈朕何望焉所以用卿者
非以富貴卿也勉卒成業何以辭為

相州賜大遼賀正旦人使却回御筵口宣元祐二年十二月二十二日

有敕卿等歲首奉觴禮成復命改轅北道弭節近藩

宜錫宴私以彰眷寵

班荆館賜大遼賀正旦人使却回御筵口宣元祐元年十一月十九日

有敕卿等遠達使辭載嚴歸駟方改轅於北道暫弭
節於都門益重眷懷往伸燕饒

賜大遼賀正旦人使正月一日入賀畢就驛
御筵口宣元祐元年十一月十一日

有敕卿等遠飭使軺來情隣好屬此方春之日宜均
既醉之歡爰命燕胥以昭眷寵

皇帝達

太皇太后迴大遼皇帝賀正旦書

元祐二年正月五日

百年之好既講於春朝萬壽之儀兼陳於幄殿恭因省侍具述來音感悱之懷言宣莫罄

皇帝迴大遼皇帝賀正旦書

元祐二年正月五日

東風協應感祖歲之更新遠使交馳導歡言而講舊繁然禮幣申以書詞欣悱之深教陳罔究

賜鎮江軍節度使判大名府韓絳詔書湯藥

口宣

元祐元年正月十日

有敕方面重寄無逾老成丘園歸休難遂雅意持頌珍劑以示至懷方此沍寒益加調養

賜新除依前中大夫守中書侍郎呂大防

免恩命不允斷來章批荅口宣

元祐元年十一月十日

有敕大政所關西臺為重朕難其選無以易卿宜即欽承母煩退避

賜新除中大夫守尚書右丞劉摯辭恩命不

允斷來章批荅口宣

元祐元年十一月十日

有敕卿嘉猷屢告清議所歸授受之間臣主無愧速起視事副朕所期

班荆館賜大遼國賀興龍節人使赴闕口宣

元祐元年十一月二十一日

有敕卿等抗旌遠道拜節近郊乃眷勤勞良深軫念
特頒燕衎以示惠慈

東坡內制集卷第一

東坡內制集卷第一

皇帝為冬節奏告永裕陵

神宗皇帝表本

伏以曆紀天正史書日至感舒長於測景增怵惕於
履霜恭惟謚號皇帝德邁堯仁功恢禹迹游衣冠
於原廟徒仰威神望松柏於橋山水懷悲慕

皇太后殿夫人為冬節往永裕陵酌獻
神宗皇帝表本

伏以一陽來復萬物懷生空臨觀後之辰無復稱觴
之慶恭惟謚號皇帝道齊履戴德冒華夷後南狩

於蒼梧神游已邈望西陵於銅雀涕慕空深

皇帝為十一月一日奏告永裕陵

神宗皇帝旦表本

伏以始餞餘寒復興嗣歲望寢園而增慕悼日月之
不留恭惟謚號皇帝道貫百王澤涵萬宇永瞻帝
所之樂坐起堯牆之悲饋奠莫由馳誠罔極

皇太后殿夫人為年節往永裕陵酌獻

神宗皇帝表本

伏以葦桃在戶徒講三朝之儀樹柏稱觴無復萬
年之壽恭惟謚號皇帝功施無外德洽有生隨鼓

湯衣寢園莫親饋奠

王承冠於原廟空極涕淚

皇帝為三月一日奏告

神宗皇帝旦表本

伏以既成春服時方禊洛之初祗謁寢園古有薦鮪
之禮恭惟謚號皇帝配天立極如日載陽仰餘澤
之旁流致群生之遠茂光靈愈遠涕慕空深

皇帝為

神宗皇帝大祥往永裕陵奏告表本

伏以寢廟告成永劬厥狀之感柏城森列遽興拱矣
之悲恭惟謚號皇帝澤浸幽生度垂後裔配天無

極奉謨訓以長存示民有終悵神游之安在恭備祥
奠莫訴哀誠

皇帝為

神宗皇帝六祥內中奏告表本

伏以追號罔極實化終身之憂祥禫有期蓋迫先王
之禮恭惟 謚號曰皇帝睿明照世神智自天雖清廟
肅雍瘳之莫見而威顏咫尺凜然常存悲慕之深華
夷所共

皇太后殿夫人為

神宗皇帝六祥往永裕陵酌獻表本

伏以颺馭上賓日以遠矣際駒邁邁祥而廓然恭惟
謚號皇帝道始家邦化刑夷夏天地之運固代謝於
陰陽草木何知徒興悲於霜露莫親饋奠惟極哀誠

賜觀文殿學士正議大夫知河南府孫固乞

致仕不許

詔元祐二年正月一日

敕孫固視國如家忠臣可以忘年視民如子君子可
以忘勞卿被遇三朝出入二府德望並隆中外所
服故起之祠館付以留篇使士有所矜式民有所依
怙屬任之意豈輕也哉釋位謀安引年求避此味遠
小臣之事非所望於卿也尚體至意勿亟懷歸

賜觀文殿學士正議大夫知河南府孫固乞

致仕不允詔元祐二年正月一日

敕孫固卿 英宗所擢以遺 神考乃眷舊學用之

西樞朕即位二年未見君子每惟圖任舊人之意常

有越在外服之歎矧欲辭位而去遂安丘園哉三川

重鎮務舉大體薄書期會則有司存優遊卒歲可以

忘老

賜觀文殿學士正議大夫知河南府孫固再

乞致仕不許詔元祐二年正月二十五日

敕孫固廊廟之舊懋事 三朝名德並隆如卿者有

幾無故釋位其謂 朝廷何卿既自為謀亦為乃后謀

之勉遵前詔以慰 中外之望

賜觀文殿學士正議大夫知河南府孫固再

乞致仕不允詔元祐二年正月二十五日

敕孫固朕永懷 三宗追用其人所以尊禮慰籍其

意者自以為無失矣而卿浩然懷歸若不可復留何

哉勉徇大義毋違朕志

撫問熙河蘭會路臣察口宣元祐二年正月二十五日

有敕卿等服勤疆場賦政兵民言念劬勞實分憂顧

特加存問以示眷懷

在京諸宮觀開啓

神宗皇帝大祥道場齋文

伏以密音如昨新劫再升望仙馭於帝鄉陳法筵於
淨宇人天來會共修取勝之緣梵釋同游永錫無疆
之慶

撫問資政殿學士知揚州王安禮口宣

元祐二年

正月二十七日

有敕卿久去廊廟出臨江淮綏懷流亡肅邊寇盜遠
惟勤瘁特示撫存

賜尚書左丞李清臣生日詔

元祐二年二月二十四日

敕清臣春之方中月後幾望篤而生王國之彥蔚為廊
廟之華神既聽於靖恭民亦宜於愷悌膺我慶賜永
綏壽祺

景靈宮奉安

神宗皇帝御容祝文

伏以恭承仙馭登宅殊庭罄海宇以駿奔儼人天之
景從願回日月之照少荅神民之心乃眷新宮永垂
餘慶

垂拱殿開啓

神宗皇帝大祥道場齋文

伏以喪期有數方歎於壑舟法海無邊聊資於岸
有嚴秘殿恭啓淨筵時御六龍徘徊宮闕永同千佛
陟降人天

賜皇對祖保信軍節度使安康郡王宗隱生
日禮物口宣

有敕卿屬尊望重德厚慶隆方誕育之令辰有匪頌
之故事克膺壽祉永服寵光

天章閣權奉安

神宗皇帝御容祝文

伏以唐虞稽古雖絕名言文武重光已新崇構下慰

華夷之望仰摹天日之容將往宅於靈宮永懷攀慕
願少安於秘殿無盡瞻依

賜皇對祖寧國軍節度使華原郡王宗愈生

日禮物口宣

元祐二年二月二十七日

有敕卿望重宗盟德隆藩服載協誕彌之旦光膺積
慶之餘特示寵頒永綏壽祉

內中福寧殿下寒節為

神宗皇帝作水陸道場齋文

伏以甚雨疾風感春律之將變鑽燧改火禱喪期之
不留爰啓淨筵以資冥福願登大覺永濟幽生

賜皇妣祖昭信軍節度使漢東郡王宗瑗生
日禮物口宣元祐二年一月二日
有敕卿爵齒既隆德望斯稱載更誕日胥慶家庭式
侑燕私以資壽祉

內中神御殿張桂奉安

神宗皇帝御容祝文

伏以祥祭告終 聖靈改御儼如在位威不違顏雖
天日之光固難形似而神入之奉永有瞻依悲慕愈
深照臨無極

神宗皇帝大祥祭訖撤饌除靈座時皇帝躬

親扶

神御別設一祭祝文

伏以旣就終喪禮當即遠永瞻 陵廟將徹几筵攀
慕若茲追懷罔極

寒萬就驛賜于闐國進奉人御筵口宣元祐二年

有敕汝等觀光上國述職遐方屬茲改火之辰想有
懷歸之念宜頒燕衍以示恩私

賜新除樞密直學士知定州韓忠彥乞改一
滿州不允詔元祐二年二月

教忠孝。朕嘗覽闕古之圖。觀宗臣之文。俯仰今昔。有
際於心。會中山闕守。美擇人門。仰庶幾焉。勉副朕意。
何以辭為。

賜樞密直學士守兵部尚書王存乞知陳州
不允諾

救王存。卿出入四朝。更涉夷嶮。金石之節。終始惟一。
六卿之長。所以倡九牧而厚風俗也。豈以職事煩簡。
為輕重哉。君子出處。朝廷之大事。而風雨寒暑。膚理
之微。亦姑安厥位。以副朕意。

奉安

神宗皇帝御容赴景靈宮導引歌詞

帝城父老三歲望堯心。天遠玉樓深。龍顏髮鬢。簪簞
遠勝。斷犀重音。雅宮春色。瑣瑤林雲。闕海沉沉。遺民
猶唱當時曲。秋鴈起汾陰。

景靈宮宣光殿奉安

神宗皇帝御容畢皇太后親詣行禮祝文

二年三月十四日

伏以。舜舜祠宮。魏魏天像。聖靈雖遠。哲命惟新。仰瞻
如在之威。永錫無疆之慶。敢祈昭鑒。下燭微誠。
景靈宮宣光殿奉安

神宗皇帝御容日開啓道場青詞元祐二年三月十四日

伏以天鑒不遠誠感則通方寶構之肇新宜真符之降格具嚴法席高咏靈篇內安清淨之居外錫蒸黎之福

景靈宮宣光殿奉安

神宗皇帝御容罷散朱表元祐二年三月十四日

馭風雲闕既參日月之光輝節琳宮尚答神民之望爰開法會庶歎真庭願推往聖之心永錫函生之福景靈宮宣光殿奉安

神宗皇帝御容日開啓道場齋文

伏以祠宮夙啓真室告成仗勝會於佛僧導靈游於梵釋更推餘祉旁及含生

賜朝散大夫試御史中丞傅堯俞乞外郡不

允詔元祐二年三月十三日

敕堯俞負中外之望居得言之地朕方虛已樂聞嘉猷乃者水旱連歲民流未止賊盜將熾財力靡散卿既欲圖實効以酬恩朕亦將考所言以責實偃息藩郡豈所望哉

五嶽四瀆等處祈雨祝文元祐二年三月十七日

期年以來水旱作沴振廩筒食冠蓋相望已責勸分
公私並竭惟待一熟之來以蘇垂死之民而冬不雨
以徂春苗將秀而不實額惟冲昧有失政刑感傷陰
陽延及鰥寡既非下民之罪亦豈上帝之心惟神聰
明母愛膏澤則民有息肩之漸神無之祀之憂

賜鎮江軍節度使充集禧觀使韓絳茶藥詔

元祐二年三月

敕韓絳春夏之交寒燠相沴起居之節調適為難春
子元正人勞于外宜加左問且錫珍良勉蹈至和以
符眷倚

賜保寧軍節度使馮京告敕茶藥元祐二年三月二十

日一

敕馮京卿以篤老久勤外服留籥之重擁髦而東蒙
犯氛埃從御良苦宜省思慮近藥物勉遵時令以副
眷懷

賜鎮江軍節度使充集禧觀使韓絳赴闕詔

元祐二年三月二十七日

敕韓絳卿擢自祖宗輔翼先帝德望之重天下
聲聞與其置之一方勞以民事不若歸安闕下式瞻
儀刑請老問居固非所望嘉猷人告夫豈不能

賜鎮江軍節度使充集禧觀使韓絳赴闕詔

元祐二年三月二十七日

敕韓絳為天下計則賢者常勞為人臣謀則老者當逸今朝廷待卿之意酌處其中奉朝請於琳宮所以系民望釋負荷於留籥所以慰雅懷勉及清和亟還朝著

賜新除保寧軍節度使馮素告敕詔書茶藥

口宣 元祐二年三月二十八日

有敕全魏之寄舊德為宜勉即征途以答民望往頒玓劑昭示眷懷

賜鎮江軍節度使充集禧觀使韓絳詔書茶

藥口宣 元祐二年三月二十八日

有敕卿德齒俱高誠請彌確重以民事久勞元臣既飭還車宜頒玓劑尚加調養以副眷懷

大相國寺開啓祈雨道場齋文

伏以旱暵既久麥禾將空仰惟天人之師宜專雲雨之施庶幾慈愍寬我憂危

集禧觀開啓祈雨道場青詞

洞淵龍王水府聖衆饑饉之患民流者暮年吁嗟之求詞窮於是日乃眷陰靈之宅實為雲雨之司涵濡

之功指顧而辦固答天澤以答民瞻

賜故夏國主嗣子乾順進奉謝恩馬馳回詔

元祐二年四月十七日

詔向遣行人往賻襄事繼陳方物來奉謝章惟忠可以附民惟禮可以定國勉然誠節以副眷懷

諸宮觀寺院等處祈雨青詞齋文

饑饉之患民派者期年吁嗟之求詞窮於是日仰惟至道之助推廣上天之仁台呼群龍時賜霈澤罔以不德而廢其言

天地社稷宗廟神廟等處祈雨祝文

惟德弗類致常易之災斯民何辜有荐饑之懼旬浹不雨麥禾皆空但三夙夜祗慄引領雲霓之望援手溝壑之餘既窮之詞其慈弗聽

賜太師文彥博進奏牒不許批答元祐二年三月二十九日

鄉出入四世師表萬民無嫌於功名而有厭於富貴其所以忘身徇國捨逸就勞者豈有求而然哉凡以先帝之恩生民之故也卿之在朝如玉在山如珠在淵光景不陳而草木自遂去就之際損益非輕昔西伯善養老而太公自至魯穆公無人子思之側而長

者去之卿自為謀則善矣獨不為朝廷惜乎藥餌有
間時遊 廟堂家居之樂何以異此

賜太師文彥博乞致仕不允批荅元祐二年三月二十

日九

朕脩身以承 六聖虛己以聽四輔而法度未定陰
陽未和民未樂生吏未稱職中夜以思方食而歎雖
不敢以事諉元老實望其以身率百官卿猶未即於
安孰敢不盡其力此聖母沖人之本意而天下有識
之所望也昔唐太宗以干戈之事尚能起李靖於既
老而穆宗文宗以燕安之際不能用裴度於未病治

亂之效於斯可見朕意如此卿 其少安

賜宰相呂公著乞退不許批荅元祐二年三月二十九日

卿才全而德備積厚而施博明亮為誠坐屈群榮既以
天下公議而用於此矣豈以卿之私意而聽其去哉
水旱之災不德所召卿當助我求所以消復之道不
當求去我也詩不云乎大夫君子昭假無贏大命近
止無弃爾成勉思厥職以答民望

賜宰相呂公著乞退不允批荅元祐二年三月二十九日

用賢之功必要之久遠日計不足歲計有餘朕之用
卿期於百姓之既富卿之自信元祐二年三月二十九日一日而成功常

賜之災天以警朕夙夜祇懼與民同之朕若歸過於朕肱何以答天戒卿若釋政而去逸何以塞民言各思其憂少安厥位

賜太師文彥博乞致仕不允批荅口宣元祐二年三月二十九日

有敕卿德望冠於累世風化聞於四夷方茲仰成倚以為重退老之請所未欲

賜宰相呂公著乞退不允批荅口宣元祐二年三月二十九日

有敕卿柱石本朝著龜當代方茲注意實所仰成

但體朕心姑安其位

賜尚書刑部侍郎范百禄乞外任不允詔元祐二年三月二十九日

敕百禄成王命君陳商民在辟子曰辟爾惟勿辟子曰宥爾惟勿宥惟厥中古之有司與天子相可否蓋如此而況公卿之間議有異同而不盡其說我例在中書與在有司固宜審處歸于至當而卿遽欲以此去位非古之道也其益慎厥官以稱朕意

賜交州進奉人朝見訖就驛衛送口宣元祐二年四月五日

四月五日

有敕汝等恭持方物來款塞垣冒涉脩途觀光上國
宜頒燕勞以示恩私

賜龍圖閣直學士新差知秦州呂公孺乞改

授官觀小郡差遣不允詔

元祐二年四月三日

敕公孺朕顧懷西方思得賢守使邊有備而民無擾
以卿耆老練達德宇淵靜秦之舊治吏士服習卧護
諸將無以易卿

故聽宣劉氏堂祭文

奉侍方年肅雍靡懈今其亡矣良用惻然沒而有知
來舉茲奠

故聽宣劉氏塋所祭文

盡瘁內職歸全近郊既掩諸幽往致斯奠賁其寔窆
趣爾哀榮

五嶽四瀆等處祈雨祝文

元祐二年四月十日

天人之交應若影響雨暘不順咎在貌言失之戶連
害及寰宇求治雖切不當天意之中聽言雖多未聞
民病之實刑罰有過賊後未平一人之愆百姓何罪
避坐徹膳猶當許其自備悔既轉災庶或救之將墜
於袖蓋反掌之易而民免擠壑之憂仰瞻雲霓待命
旦夕

五嶽四瀆等處謝雨祝文

元祐二年四月十日

乃者常暘為灾歷時愈熾念咎責己寧丁我躬求哀
籲天並走群望果蒙膏澤之賜一拯流亡之餘我愧
于民敢廢無災之懼神終其賜願必有年之祥

鄭州超化寺祈雨齋文

元祐二年四月九日

伏以常暘為灾歷時愈熾秋穀未藝夏苗將空天意
未回佛慈所愍願以不思議智力大解脫神通時興
法雲普賜甘澤

鄭州超化寺謝雨齋文

元祐二年四月九日

等慈應物不倦於禱示神智無方何難於膏澤旱洽

既弭農民其康仰惟不宰之功豈待有為之報爰備
淨供少達純誠

景靈宮罷散奉安

神宗皇帝御容道場功德疏文

元祐二年四月七日

伏以肇新寶構祗奉時容修妙供於殊庭結勝緣於
淨衆真游永奠法會告成普冀含生悉蒙餘祉

賜外任臣寮進奉興龍節馬詔教書

元祐二年四月

敕韓縝誕彌之慶遠邇攸同眷惟外服之良來效石
牽之禮言念誠恪不忘歎嘉

賜彰化軍節度使開府儀同三司判大宗正
事宗晟上表乞還職事不許詔元祐二年四月十五日
敕宗晟書云孝乎惟孝友于兄弟施於有政是亦為
政卿以膝下之養為宗人之法古之為政孰大於此
而欲以親辭職耶其益備厥官以稱吾意

賜彰化軍節度使開府儀同三司判太宗正
事宗晟上表乞還職事不允詔元祐二年四月十五日
敕宗晟古者庶子之宜治而邦國有倫所治雖簡而
所寄甚重卿為宗室祭酒德度之美刑于中外朕方
慶瓜瓞之茂而欲觀麟趾之應益勵厥職無弃爾成

永裕陵備移角堦門戶伯竄奏告

神宗皇帝祝文

園寢之奉巡行以時增植所宜卜云其吉先事而告
亦禮之常

永裕陵備移角堦門戶伯竄祭告土地祝文
寢園之奉栽植以時惟尔有神實嚴所守敢祈昭鑒
永底平寧

白溝驛賜大遼賀坤成節人使御筵燕傳宣

撫問口宣元祐二年四月十七日

有敕卿等肅將慶幣遠涉脩塗風埃浩然徒馭勤止

宜頒燕衍以示眷懷

東坡內制集卷第二

東坡內制集卷第三

賜尚書左丞李清臣乞退不允批荅

元祐二年四月

十八日

卿以方聞之舉擢自厚陵禁林之選用於神考逮受顧命獨予冲人義既同於戚休身豈輕於出處遽欲引去聞之惻然姑安厥常以助子治

賜尚書左丞李清臣乞退不許批荅

元祐二年四月

十八日

祥除之初念我聖子所與共政不忘舊人而卿博學多聞通練古今小心畏慎不見過失力引求去為之

惘然勉留輔予益祗厥服

賜文武百寮文奏博以下上第一表請

皇帝御正殿復常膳不允批荅元祐二年四月二十二日

朕即位二年水旱繼作致災之故實惟冲人既迺及於無辜復貽憂於文母是以坐不安席食不甘味實欲深念厥咎豈徒見之空言而雨不崇朝晨猶告病欲徇來請惕然未寧其一乃心勉正厥事毋重朕之不德以荅天之深戒

賜文武百寮文奏博已下上第一表請

太皇太后復常膳不許批荅元祐二年四月二十二日

旱暵之罰自冬及夏天之降災如此其久則夫致災之道豈一日而然哉雖力行罪已之文尚恐非應天之實而御等以膚寸之澤遽欲即安覽之惕然未敢自赦其交修不逮務盡厥誠期茲歲於有秋雖復常其未晚

集禧觀洪福殿等處罷散謝雨道場青詞齋

文

德有愧於動天敢辭屢請道無私而應物豈間微誠沛一雨以咸周起三農於既病仰承靈貺莫報深仁集禧觀洪福殿罷散謝雨道場朱表

旱曠為灾禱求屢瀆賴神之賜霈澤以時蓋至道之
無私豈不德之能致載陳謝懇少荅靈休

賜尚書左丞李清臣乞退不允批荅口宣元祐

二年四月二十七日

有敕卿綜轄樞機雍容廊廟義當體國謀豈先身往
喻至懷少安舊服

賜溪洞蠻人彭允宗等進奉端午布 敕書

元祐二年五月十日

敕彭允宗族居裔壤心慕華風來備任土之儀遠效
充庭之實載惟懇悃良用歎嘉

賜集禧觀使鎮江軍節度使開府儀同三司

韓絳到闕生餽口宣元祐二年七月十日

有敕卿力辭繁劇歸即燕安想見老成渴聞嘉話特
頒牢醴以勞駉駉

神宗皇帝禪祭

太皇太后親行祝文

寒暑之變忽焉再暮練祥之餘復將三月勉從即言
之典莫遂無窮之哀

神宗皇帝禪祭

皇帝親行祝文

既祥之餘徒月而吉迫於先王之禮徒有終身之憂
瞻仰 聖靈伏深感慕

神宗皇帝禫祭

皇太后親行祝文

喪期有數禫月告終哀雖未忘禮弗敢過追慕之至
中外所同

賜文武百寮文彥博已下上第五表請

皇帝御正殿復常膳允批荅 元祐二年五月二十九日

朕以寡昧膺受多福常欲損上益下畏天之威矧茲
旱灾咎在不德而卿等以雨澤既至封章屢上勉從

其意甚媿于中夫天之有風雨雷霆猶朕之有號令
賞罰朕不脩明其事何以責應于天永思其終無忘
納誨

賜文武百寮文彥博已下上第五表請

太皇太后復常膳許批荅 元祐二年五月二十九日

德積無素民罹其災精誠莫通禱不時應雖蒙膏澤
之報僅救焦枯之餘勉徇來衷猶虞後患其謹視盜
賊勲卹流亡益務交脩以裨不逮

景靈宮天興殿開淘井眼祭告里域真官祝
文

神游之庭井泥不食日辰之吉浚治以時諡爾明靈庶無悔咎

賜新除尚書左丞劉摯辭免恩命不允詔

敕劉摯朕昔聞卿言今任以政已試之效見于事功廊廟闕人以次遷用宜其右不宜其左能於昔不能於今豈有是哉

賜新除中大夫守尚書右丞王存辭免恩命

不允詔元祐二年五月二十六日

敕王存朕歷選百辟試之以事博厚而文剛毅而和更涉變故德守不移無逾卿者夫享天下之利者任

天下之患居天下之樂者同天下之憂朕非以是富貴卿也其何以茲

賜皇伯祖彰化軍節度使高密郡王宗晟生

日禮物二宣元祐二年六月一日

有敕卿德茂宗枝望隆公衮推本派長之慶有嘉震肅之辰宜是寵頒以綏壽祉

班荆館賜大遼國賀坤成節人使到闕御筵

口宣元祐二年六月二日

有敕卿等肅將慶幣垂及都門遠涉暑塗想懃行李或禎燕衍以示恩私

賜新除吏部侍郎傅堯俞辭免恩命乞知陳
州不允詔元祐二年六月十三日

敕堯俞連蹇三黜栖遲十年士無賢愚為國太息如
珠玉之在泥土麟鳳之在網羅朕所以拔卿於文殿
之中用卿於期年之內天下拭目欲觀所為而乃引
微疾以自言指便郡而求去豈獨於卿有報國未遂
之歎亦將使朕獲用賢不終之譏勉復舊曹以全大
節

賜護國軍節度使檢校太師濟陽郡王曹佺
生日禮物口宣元祐二年六月九日

有敕卿世濟勲勞德隆藩戚屬此誕弥之日豈無燕
喜之私膺我寵頒永增壽祉

賜新除中大夫守尚書右丞王存辭免恩命
不允斷來章批荅元祐二年六月十二日

士有品目定于僉言器之廟堂蔽自朕志豈有僉言
既稔朕志不移而用過謙之詞反已成之命亟服乃
事宜無復云

賜新除中大夫守尚書右丞王存辭免恩命
不許斷來章批荅

為國不患於無人有人而不用之為患事君非難於

辭寵居寵而無媿之為難吾之用卿計已審矣卿之
自信又何疑哉

賜文武百寮太師文彥博已下上第一表請

舉樂不許批荅

元祐二年六月一日

先王之禮樂因情而立文君子之哀樂自中而形外
夫有莫大之戚則有無窮之悲先皇帝天覆四方
子養萬物至今窮髮之表尚餘流涕之民而况宮庭
之間母子之愛粗畢三年之制遂講八音之和所未
忍聞非不欲作卿等謹於率禮為於愛君徒欲亟舉
舊章顧未深明吾意二復太息難於聽從

賜文武百寮太師文彥博已下上第一表請

舉樂不允批荅

元祐二年六月一日

禮之至者無文哀之深者無節故禫而不樂古人非
以求名琴不成聲君子以為知禮朕以宗廟之重
勉蹈先帝之餘履其位惕然而自驚用其物潛焉
而出涕未報昊天罔極之德常懷終身不忘之憂欲
從衆言亟舉備樂而金石絲竹乃悽耳之聲干戚羽
旄皆眩目之具哀既未泯樂何從生再閱來章徒增
感慕

賜文武百寮太師文彥博已下上第二表請

舉樂不許批荅

元祐二年六月四日

過密之制雖盡於三年追懷之私豈論於徒月金石在御惻然未寧吾不以一身之憂廢天下之樂今施之郊廟用之軍旅州閭之會絃歌相聞獨盡餘哀止於中禁以為於義未害是故行之不疑

賜文武百寮太師文彥博已下上第二表請

舉樂不允批荅

元祐二年六月四日

朕少遭閔凶僅畢祥禫雖俛就企及非以過制為賢而創巨痛深不能以禮自克觀過其黨聖人許之禮曰喪三年以為極亡則弗之忘矣誠重違國老之忠

告姑欲盡人子之至情

賜太師文彥博等請

太皇太后受冊第二表不許批荅

元祐二年六月四日

吾聞聖人以天下為憂未聞以位號為樂也損已裕物畏天檢身此吾平日之本心非獨遇災而一發也孔子曰以約失之者鮮矣卿等以是輔我顧不美哉

賜集禧觀使鎮江軍節度使開府儀同三司

韓絳乞致仕不允詔

元祐二年六月四日

敕韓絳向以宏才卧護此道凡斯民之利病蓋一方之安危朕方虛懷以待元老冀疾病之有間得雍容

而造朝時聞嘉言以輔不逮告老之請殊非朕心

賜韓絳乞致仕不允詔元祐二年六月四日

元老在位邦之榮華徒以精神折衝非以筋力為禮
游神道館擁節家庭於鄉同告老之安而國有貪賢
之美勉自輔養期於少留

賜同知樞密院事范純仁生日詔元祐二年六月十八日

救純仁卿天資文武世濟勲勞載嘉誕日之臨豈獨
私門之喜宜膺慶賜以介壽期

賜文武百寮太師文彥博已下上第四表請

舉樂不許批荅元祐二年六月九日

吾之本性以清淨寤冥為樂雖在平日無游觀聲技
之念矧艱難之後哀感之餘中夜以興方食而歎將
不堪其憂者豈有意於樂哉雖欲勉從未能自克忠
告屢却愧歎兼深

賜文武百寮太師文彥博已下上第四表請

舉樂不允批荅元祐二年六月九日

鍾鼓以導和羽籥以飾喜譬之飲食之節遠於口體
之宜今衰麻之除莫敢逾制而琴瑟之御則有未安
卿等忠誠確然開喻至矣惟反求諸心而弗得故欲

行其言而未能推之人情當識朕意

賜太師文彥博等上第三表請

太皇太后受冊許批荅元祐一年六月九日

吾上順帝則下酌民言處以無心期於寡過卿等以為協氣既應羣謀僉同若固違典禮之常恐莫慰天人之望遇災而懼昔者非以為謙聞義則遷吾亦豈敢自必勉從故事以副嘉言

就驛賜大遼賀坤成節使副銀鈔羅錦被褥

等口宣元祐二年六月二十八日

有敕卿等遠持慶幣來講鄰歡徒馭少休舍館既乏

首膺寵錫當體眷懷

賜新除試吏部侍郎范百祿辭免恩命不允

詔元祐二年六月十二日

夫以天官之貳治夏卿之選簿書繁重條格紛委苟非其人則士之失職而無告者多矣朕難其材不以輕授卿有應務之敏而行之以勤有守官之亮而濟之以通往行其志何以辭為

賜皇對楊王顯生日禮物口宣元祐二年七月十九日

有敕卿屬尊魯衛德重間平每臨載育之辰永錫無窮之慶宜膺寵數以介壽祺

相州賜大遼賀坤成節人使却迴御筵口宣

元祐二年七月八日

有敕卿等遠涉歸途再離秋暑駕言近郡少憇旋車宜示眷懷往頌燕俎

賜外任臣寮進奉坤成節銀

敕書

元祐二年七月

二十日

敕劉昌祚汝承派外服雅意本朝爰因載誕之辰遠致同寅之禮眷惟忠蓋良極歎嘉

雄州撫問大遼使副賀坤成節口宣

元祐二年七月

二十日

有敕卿等抗旃備好馳傳及疆遠涉暑途實勞驂馭特加存撫式示眷懷

賜新除知樞密院安燾辭免恩命不允詔

元祐

二年六月二十四日

敕安燾人才之難後古所歎圖任以舊為國之常卿以瓌異之資荷艱難之寄憇勞靡懈望實愈隆雖云超陞不改疇昔徒以任之既久則責之宜專知無不為乃所望於卿者卑以自牧亦何補於國哉

賜皇弟山南東道節度使開府儀同三司

生日禮物口宣

元祐二年六月十八日

有敕卿以棣華之親藜瓜之慶載臨誕日宜厚寵
頒服我異恩永膺介福

賜新除知樞密院安燾辭免恩命不許斷來

章批荅元祐二年六月二十四日

覽表具之論材考德聖人所以公天下難進易退君
子所以善一身權之以義孰為輕重訓兵論將威懷
戎狄卿以是事上豈不賢於逡巡退避也哉

賜新除知樞密院安燾辭免恩命不允斷來

章批荅元祐二年六月二十四日

覽表具之德稱其服臣主俱禁食浮於人上下交病

朕之為天下慮甚於卿之自為謀也思而後行有出
無反成命不拜卿母復辭

賜安燾辭免恩命不允斷來章批荅口宣元祐

二年八月五日

有敕卿以舊德簡在朕心成命既孚僉言咸獲宜即
祇受毋煩同辭

賜權陝府西路轉運判官孫路銀絹獎諭

敕書元祐二年六月二十八日
為孫蘭州西荆堡成下同

敕孫路宣力計臺悉心邊政相視衿要繕完保郭訖
用有成不愆于素使虜無可乘之便民有是恃之安

乃眷忠勤不忘嘉歎

賜知蘭州王文郁銀絹獎諭

敕書元祐二年六月

二十日

敕王文郁汝以禦侮之才當專城之寄日堵皆作三月而成非威服民夷身先士卒則安能以一時之役成無窮之利達于朕聽良用歎嘉

賜新除檢校太尉守司空依前開府儀同三司致仕韓絳辭免恩命不允批荅元祐二年七月七日

國家尊異耆老砥礪廉隅凡致為臣必厚其禮而况卿出入四世師表萬民身任安危位兼將相永惟

三宗眷遇之重宜極一品褒崇之榮成命既孚僉言惟允宜從中外之望固徇謙沖之私

賜韓絳辭免恩命不允批荅元祐二年七月七日

朕惟耆老成人雖或謝事耄期稱道終不忘君其在丘園豈殊廊廟嘉猷入告卿其不易此心大事就訪朕之敢忘斯義命秩之數典冊之文不如此無以慰朕心而答民望國有常典卿毋復辭

瀛州賜大遼賀坤成節人使回程御筵口宣

元祐二年七月十日

有敕卿等抗旌來聘已事言還方次邊城少休候館

宜頒燕俎以勞歸驂

賜知樞密院事安燾已下罷散坤成節御筵口宣

有敕卿等忠存體國義切戴君結妙果於三乘祝慈闈之萬壽宜膺寵錫以示眷存

玉津園賜大遼賀坤成節人使射弓例物口宣元祐二年七月八日

有敕卿等致命寶鄰出遊禁園爰敦射事以佐宴歡宜旌審固之能式厚珍良之賜

賜大遼賀坤成節人使庄餼口宣元祐二年七月八日

有敕卿等遠涉脩塗來陳慶幣舍館初定徒馭實勞宜錫餼牽以昭寵數

賜大遼賀坤成節人使內中酒果口宣元祐二年七月十一日

有敕卿等遠馳使傳申講隣歡既執贄以造廷亦展幣而成禮宜加寵錫以示眷存

賜大師文彥博已下罷散坤成節道場香酒果口宣元祐二年七月十一日

有敕卿等贊天猷倡先多士方慈闈之獻壽嚴法會以薦誠宜有寵頒以昭殊眷

賜知樞密院事安燾已下罷散坤成節道場
香酒果口宣元祐二年七月十日

有敕卿等同端忠嘉助成孝治方
慈闈之獻壽嚴法會以薦
誠宜有寵頒以昭殊眷

坤成節就驛賜于闐國進奉人海筵口宣元祐二年七月十日

有敕汝等秋塞觀光超庭效貢屬詠彌之稱慶均燕
衍以示慈祇服寵嘉式旌忠恪

賜殿前都指揮使兼達巴下罷散坤成節道
場香酒果口宣元祐二年七月十日

有敕卿等同罄純忠力脩勝果用祈慈壽既徹梵筵
宜有寵頒以昭眷遇

賜皇伯祖鎮南軍節度使開府儀同三司宗
彊已下罷散坤成節道場香酒果口宣元祐二年七月十日

有敕卿表率宗盟助成孝治祝延
慈壽仰托佛乘既畢梵筵宜加寵賚

賜平海軍節度使駙馬都尉李瑋已下罷散
坤成節道場香酒果口宣元祐二年七月十日

有敕卿等乃心王室同輸欲報之誠稽首佛乘共祝

無疆之壽既成法會宜示寵頒

賜皇封楊王荆王醴泉觀罷散坤成節道場

香酒果口宣元祐二年七月十二日

有敕卿等德冠邦家義兼臣子脩勝緣於西竺祈壽
嘏於南山宜有寵頒以成法會

賜新除依前靜海軍節度使進封南平王李

乾德制誥敕書元祐二年七月八日

敕朕子養兆姓囊括四荒譬之於天豈吝膏澤卿守
藩滋久事上益虔高爵隆名極其榮顯庶緣又寵以
服民心其思盡忠以稱恩禮

班荆館賜大遼賀坤成節人使回程酒果口

宣元祐二年七月十六日

有敕卿等講成聘禮歸次都門復此少留逝將言邁
宜頒錢帛以寵行驂

皇帝達

太皇太后迴大遼皇帝賀坤成節書元祐二年七月二

嘉月令辰薦生壽母珎函重幣交慶寶鄰已恭致於
德音復欽傳於慈旨其為感懌未易名言

皇帝迴大遼皇帝問候書元祐二年七月二

四壯戴馳遠勤於使介尺書為問申講於隣歡方履

素秋克膺純福益祈保護式副願言

太皇太后 皇太后皇太妃受冊奏告太廟

并諸陵祝文元祐二年六月十九日

伏以祗事親闈庶幾孝治配德祖考既務極於推崇
篤生眇冲亦敢忘於裒顯將奉寶冊率循舊章消日
甚良先期以告

太皇太后 皇太后皇太妃受冊奏告景靈

宮等處青詞元祐二年七月十九日

伏以懿親闈庶幾孝治配德祖考既務極於推崇
為生眇冲亦敢忘於裒顯將奉寶冊率循舊章消日
甚良先期以告

于神先期以告

賜前兩府并待制已上知州初冬衣襖詔元祐二年九月七日

秋元發歲將墜戶工告始求宜頒在笥之珎以示維
藩之寵服之安煥體我眷懷

賜諸路知州職司等并總管鈐轄至使臣初
冬衣襖敕書

秋馮潔已王事靡盬日月其除屬霜露之戒寒待衣
求而卒歲宜加寵錫以示眷懷

賜諸路蕃官并溪洞蠻人初冬衣襖敕書

教贍職在捍邊志常面內屬此嚴焚之候宜均輕
煖之恩服我寵頒益思忠報

賜諸路屯駐駐泊就糧本城諸官寮寺初冬
衣襖都教

教汝等久勤外服屬戒祈寒爰念捍城之勞普均袂
纊之惠

西京應天禪院會聖宮脩神御帳座畢功告

遷諸神御祝文元祐二年八月二日

頃詔有司恭脩惺座暫安別殿以作庶工既匠事之
告成宜真游之來復願垂昭鑒及此良辰

西京應天禪院會聖宮脩神御帳座畢上奉

安諸神御祝文元祐二年八月二日

惺坐告成允協歲時之吉靈游永奠復瞻天日之光
庶俾後人仰蒙餘慶

賜西南羅蕃進奉教書元祐二年九月三日

教汝世為要服時欵塞垣志慕華風來脩職貢載惟
忠恪良用歎咨

東坡內制集卷第三

東坡內制集卷第四

賜熙河秦鳳路帥臣并沿邊知州軍臣察茶

銀合兼傳宣撫問口宣元祐二年八月十日

有敕卿等夙分邊寄深識虜情屬此盛秋勞於警備

宜加寵賚以示眷懷

賜熙河秦鳳路提刑轉運茶銀合兼傳宣撫

問口宣元祐二年八月十日

有敕卿持節宣風久分憂寄調兵足食想極賢勞宜

有寵頒以彰眷遇

賜觀文殿大學士光祿大夫知永興軍韓縝

茶銀合兼傳宣撫問口宣

元祐二年八月一日

有敕卿釋政廟堂均勞方面兵民之重綏御實勞往諭至懷仍加寵眷

賜皇弟武成軍節度使邠國公德生日禮物

口宣

元祐二年八月十六日

有敕卿棣華襲慶桐葉分封載臨震肅之辰特致壽康之祝其膺寵錫以介神休

賜朝議大夫試戶部尚書李常乞除汭邊一

州不允詔

元祐二年八月二十二日

敕亦常在泮獻馘亦儒者之常挺劔疾關蓋孔門之

事雖然義有輕重理有後先與其自請得遠治癘疥之疾曷若盡瘁事國幹心膂之憂苟推是心何往非報雖願受長纓而往者卿之本心然自以尺莖而鞭之吾有餘力尚體此意姑安厥官

賜太師平章軍國重事文彥博宰相呂公著自今後入朝凡有拜禮宜並特與免拜詔

元祐二年八月十五日

敕彥博朕聞凡杖以優賢著之典禮蓋老無下拜書於春秋魏太傅鍾繇以足疾乘車就坐自尔三公有疾以為故事而唐司徒馬燧亦以老病自力對於廷

英詔使母孫今吾耆老大臣四朝之舊德隆而望
重任大而憂深者惟卿與公著而已
云惟公著與卿
而方資其著龜之告豈責以筋力之
禮禮今後入朝凡
有拜禮宜並特免卿其專有為之報
略無益之儀毋
或固詞以稱朕意

賜宰相呂公著乞罷相位除一外任不許批

答元祐二年八月

夫以才御物才有盡而物無窮以道應物道無窮而
物有盡凡今之患所乏非才以卿薦於愛君必能建
長久之策澹然無我可以寄枉直之權二年于茲百

度惟正事既就緒民亦小康至於微疾之屢攻此之
高年之常理卿其良食自輔為國少安譬如止水之
在槃豈復勞心於鑿物心且不勞而况於力乎

賜宰相呂公著乞罷相位除一外任不允批

答元祐二年八月十五日

朕以天下之大知為君之難有朽索馭六馬之憂有
抱火措積薪之懼正賴多士協為一心朝夕以思彌
縫其闕凡今中外執事膂力之異陳視吾一二老臣
進退以為節卿若無事而引去人將相顧而自疑而
况邊鄙未寧在民多故而予左右之老先自求於便

安則夫疎遠之臣何以責其盡瘁勉輔不逮期於有成

賜宰相呂公著乞外任不允批荅口宣元祐二年

十八日二

有敕全德之老朕所仰成大義未安卿當畏去純忠所激微疾自吟

賜新吟兼侍讀依前光祿大夫吏部尚書蘇

頌辭元祐二年八月恩命不允詔元祐二年八月

敕蘇頌朕惟亡右正人之求甚難其選以為直亮多聞之益宜莫如卿方虛懷於至言豈曲從於遜避亟

服乃事母煩固辭

迎奉

神宗皇帝御容赴西京會聖宮應天禪院奉

安導引歌詞

經文緯武十有九年中遺烈震羗戎渭橋夾道千君長猶是建元功西瞻温洛與神松蓮宇照瓊宮人間俛仰成今古流澤自無窮

劄子元祐二年

臣近奉聖旨撰賜文彥博呂公著今後入朝免拜詔書今又準內降旨麾撰不允彥博辭避免拜批荅

臣謹按禮經八十拜君命一座再至所謂拜若命者
傳命而拜非朝見也然且不免周天子賜齊桓公胙
曰伯父耄老無下拜公曰天威不遠類咫尺下拜登
受所謂無下拜者拜於堂上非不拜也然且不敢鐘
繇以足疾乘車就坐疑若不拜然亦無明文君前乘
車豈足為法而馬遜延英不拜蓋是臨時優禮無今
後遜不復拜之文祖宗舊例如呂端之流以老病進
對心於臨時傳宣不拜今來老博公著今後免拜
指麾自是朝廷優賢貴老度越古今無可議者但
臣是有司合守典禮兼恐老博公著終不敢嘗以臣

愚見不若允其所請若聖恩優閑老臣眷眷不已遇
其朝見間或傳宣不拜是以為非常之恩臣忝備侍
從懷有所見不敢不盡所有不允批荅臣未敢撰取
進止

御寶批依奏脩撰允所請批荅進入

賜太師文彥博辭免不拜恩命許批荅元祐二年

八月二十七日

卿義重股肱望隆堂陛陞廡遠則堂皇峻股肱逸而
元首安故出異恩特鑄奇禮而卿深執恭巽力守典
刑確然自陳義不可奪勉從其意愧歎于中

賜太師文惠博辭免不拜恩命允批荅元祐二年

八月二十七日

朕優禮師傅達德齒之尊以亟拜為可略古之道也
卿謹嚴朝廷明君臣之分以不拜為未安禮之節也
道並行而不悖義有重而難移勉徇所陳不忘嘉歎

賜宰相呂公著乞罷相位不許斷來章批荅

元祐二年八月二十七日

孔子曰苟有用我者春月而已可也三年有成夫以
聖人猶待三年而後成功況其下者今卿助我為治
自以為既成矣乎其未也譬如玉人雕琢玉中道而

易之豈復成器哉

賜宰相呂公著乞罷相位不允斷來章批荅

元祐二年八月二十七日

古者君臣之間率常千載一遇今聖母在位正身
虛己仰成輔弼雖踈遠小臣猶欲畢命自效而卿乃
以小疾求去縱無意於功名獨不惜此時乎勉卒乃
事使百姓富足四夷乂安然後謝事歸老豈不臣主
俱榮哉

賜宰相呂公著乞罷相位不允斷來章批荅

口宣元祐二年八月二十七日

元祐二年八月二十七日

有敕卿之在位為德與民朕意不移徒煩屢請速起視事毋復固辭

賜守司空開府儀同三司致仕韓絳乞受冊禮畢隨班稱賀免赴詔元祐二年八月二十七日

敕韓絳卿脫屣軒冕頤神丘園不為絕俗之高愈篤愛君之意喜聞冊號請覲內廷在臣子之誠心卿為盡節顧筋骸之末禮吾所未安

賜宰相呂公著乞罷免相位不允詔元祐二年八月二十日

敕宰相之責綏靖四方羗人既俘士氣益振長轡遠

馭方資老謀卿不强起孰卒吾事近以二老之故削亟拜之禮而疼博執謙不回朕既從其請矣卿起就位復何疑哉

賜皇弟定武軍節度使開府儀同三司咸寧郡王侯生日禮物口宣元祐二年八月二十日

有敕眷予母弟誕慶茲辰載詠斯千之祥宜均既醉之福祗膺寵數永錫壽祺

賜太師平章軍國重事文彥博辭免入朝拜禮允批荅口宣元祐二年八月二十日

有敕卿勲德愈高謙恭不伐盡事君之禮忘屈身之

勞重違嘉言特寢前命

生獲鬼章文武百寮稱賀宣答詞元祐二年八月二十

日

太皇太后

種羗叛換西鄙繹騷首出偏師遂擒元惡安邊之喜與卿等同之

皇帝

凶狡就俘羗戎一震既增吏士之氣亦寬戍守之勞靖寇息民與卿等同喜

八月二十八日入內高班蔡克明傳宣取批

答宰臣以下賀生獲鬼章表

太皇太后

國家偃兵息民函養中外鬼章無故犯順神人弃之雖廟社無疆之休亦將相一心之助封章來嘉歎不忘

皇帝

朕上承慈訓下盡群策務漸寬於民力本無意於邊功既狂狡之就擒知休息之有日再閱來奏嘉歎于中

賜皇封成德荆南等軍節度使守太尉開府

儀同三司荆王頽生日禮物口宣元祐二年八月二十日

有敕卿以名世之傑居對父之親乃眷良辰實鍾餘慶宜膺異數之禮永錫無疆之休

賜宰相呂公著辭免不拜恩命允批荅元祐二年

九月三日

卿執德惟一守禮不回不以坐論為安而以拜上為泰使朕不盡養老之意而卿得畏威之道勉從其志嘉歎不忘

賜宰相呂公著辭免不拜恩命許批荅元祐二年

九月一日

君之視臣譬之手足方責其大不强所難而卿深執謙恭力求避免深惟孔子事君盡禮之義曲從其請以敬情媮

熙河蘭會路賜种誼已下銀合茶藥及撫問

犒設漢蕃將校以下口宣元祐二年九月二日

有敕汝等受成元帥問罪種羗既俘凶渠備見忠力各加犒賜用示眷懷

賜保靜軍節度使檢校司空開府儀同三司

建安郡王宗綽生日禮物口宣元祐二年九月二日

有敕位隆將相德重宗藩方秋律之既深紀門孤之多慶宜膺寵錫以介壽祺

撫問劉舜卿兼賜銀合茶藥口宣元祐二年九月二日

有敕卿翰屏西服威懷種羗嚴兵盛秋得雋戎落特遣勞問仍示寵頒

賜陝府西路轉運判官孫路銀合茶藥口宣

元祐二年九月五日

有敕汝以職事出按邊防屬此軍興想勞心計宜加寵錫以示眷懷

賜陝府西路轉運司勾當公事游師雄銀合

茶藥口宣元祐二年九月五日

有敕汝以儒臣習知疆政三事靡盬周爰咨謀宜有寵頒以旌勲瘁

西京會聖宮應天禪院奉安

神宗皇帝御容奏告 諸帝祝文元祐二年九月六日

於穆 神考陟配在天有嚴祠宮後祀 我祖時日

協吉聖靈其安寵綏後人永錫純嘏

西京應天禪院會聖宮奉安

神宗皇帝神御祝文元祐二年九月六日

於皇在天丕冒下土矧此山陵之近顧瞻兩都寔於

嵩洛之間上照五聖有嚴淨宇會聖宮改祇奉粹顏

願追梵釋之遊會聖宮改永答人天之望

生擒西蕃鬼章奏告 永裕陵祝文元祐二年九月

日五

大獮獲禽必有指蹤之自豐年高廩孰知耘耔之勞
憬彼西戎古稱右臂自嘉祐末木征擾邊至熙寧中
董種方命於赫聖考恭行天誅非貪尺寸之疆蓋為
民除蠱蠱遂建長久之策不以賊遺子孫而西蕃大
首領鬼章首犯南川北連拓拔申命諸將擇利而行
旋聞偏師無往不克吏士用命爭酬未報之恩 聖

靈在天難逃不漏之網已於八月戊戌生獲鬼章頡
利成擒初無渭水之恥郵支授首聊報谷言之寃謹
當推本聖心益脩戎略務在服近而來遠期於偃革
以息民仰冀威神曲垂昭鑒

賜太師文彥博上第一表乞致仕不允批荅

元祐二年九月八日

省表具之卿之求去蓋數矣言不為不切而朕終莫
之從朕之留卿亦至矣禮不為不盡而卿終莫之亮
君臣之際情不相喻朕甚疑之夫樂丘園而厭軒冕
亦古人之一節而非聖賢之高致尊者老以重 朝廷

蓋天下之大計而非冲人之私欲與其使朕屈公議
以從卿曷若卿少貶其私意以徇天下乎

賜太師文彥博上第一表乞致仕不許批荅

元祐二年九月八日

覽表具之卿之所以欲去者二疲於朝會勞於應物
一也功成身退欲享其樂二也而吾之所以必留者
三卿以傑人之資開物成務世不可闕一也弼亮
四朝更涉變故謀無遺策二也名冠天下進退之間
為國休戚三也吾方盡養老之道殺禮以優賢廟堂
之上猶有足樂則夫卿之欲去者可回而吾之必留

者豈不可易也

賜太師文彥博乞致仕第一表不允批荅

元祐二年九月九日

有敕朕上承慈訓下酌民言秉國之威非卿莫可來
請雖切朕意不移

賜太師文彥博乞致仕不許斷來章批荅

元祐二年九月十一日

覽表具之為君難為臣不易非吾推誠無疑不能起
卿於安佚非卿忘身徇國不能從我於艱難官用之
初中外相慶搢紳莫不競勸父老至於涕流中道而

歸其義安在宜思一身之樂輕於社稷毋使庶人之議及於朝廷

賜太師文彥博乞致仕不允斷來章批答

元祐二年九月十一日

省表具之君子安身業德如山嶽之鎮開物成務如江河之流若山嶽之鎮動搖不安江河之流行止自便則物將交病人之何觀朕之望卿無以異此宜守不移之志以成可大之功

賜太師文彥博乞致仕不允斷來章批答

元祐二年九月十一日

有勅卿望重百辟威間四夷進退之間輕重所寄毋煩屢請朕命不移

賜太師文彥博乞致仕不允詔元祐二年九月十日

救彥博卿求退之意著於士民執謙之心信於天地勉當委重之託初無懷祿之嫌大我苟安細故可略朕命不再卿其少安

賜太師文彥博乞致仕不許詔

救彥博論道則忘年卿不可以年既高而為請稱德則鄙力卿不可以力不足而為詞斷之於中義有不

易豈以屢請之故而廢將成之功體君至懷以慰公

議

十月一日永裕陵下宮開啓資薦

神宗皇帝道場齋文元祐二年九月十一日

橋山永望莫聽弓劍之餘陽月薰臨徒增霜露之感

招迤淨衆崇建梵筵庶集勝因仰資真馭

撫問秦鳳等路臣寮口宣元祐二年九月十八日

有敕卿等綏馭兵民布宣條教眷惟忠藎想極劬勞

屬此早寒各宜厚愛

西京會聖宮應天禪院奉安

神宗皇帝御容禮畢開啓道場齋文元祐二年九月

日十七

原廟告成神游既奠雖聖靈之無礙對越在天從

世法之有為歸依於佛普願幽明之域悉登淨妙之

庭集此勝因以資仙馭

白溝驛傳宣撫問大遼賀興龍節人使及賜

御筵口宣元祐二年九月十二日

有敕卿等遠馳信幣來慶誕辰念此脩塗喜於入境

宜加燕勞以示眷存

西京會聖宮應天禪院奉安

神宗皇帝御容前一日奉告永裕陵祝文元祐

二年九月三日

國家推本漢儀立郡國之廟參用唐制就佛老之祠
乃眷洛都載瞻園寢並興靈宇以奉神嬉閔維冲人
恭臨成憲謹擇良日臨遣近臣庶回日月之光少答
人天之望

沿路撫問奉安

神宗御容禮儀使呂大防已下口宣元祐二年九月

日十二

鄭州

有敕卿等恭持使節祗事祠宮涉郵途實勞啟處

特加存問以示眷懷

鞏縣

有敕卿等出使別都展儀原廟衝涉微稟勤勞遠涉
體此眷懷宜加調衛

西京

有敕卿等暫去闕庭服懃郵傳奉祠之重率禮為勞
已事端歸式符眷遇

賜嗣濮王宗輝生日禮物口宣元祐二年九月二十二日

有敕流澤之深積慶之厚嘉此良日篤生賢王受茲
多儀永錫難老

永裕陵十月旦表

戒寒堽戶。倏及於秦。正前晦行陵。祗猶於漢禮。恭惟
謚號皇帝。懿文緯世。厚德載時。休老勞農。追述養民
之政。厲兵講武。敢忘經國之謀。永望寢園。益增感慕。
西京會聖宮應天禪院奉安

神宗御容禮畢。押賜禮儀使已下御筵口宣。

元祐二年九月二十一日

有敕卿等既成原廟。復奠神游。乃眷元臣。往嚴盛禮。
宜均燕衎。以示眷存。

賜龍圖閣直學士尚書工部侍郎蔡延慶乞

知應天府不允詔。元祐二年九月十六日。

救延慶入侍禁近。出殿藩服已試之效。藹然有聲。今

若予工宜有餘力。夫游亦肯察尚不辭難。退食委蛇。

豈當告病。膚理微疾。行當自痊。勉安。欽官以稱朕意。

賜外任臣寮等進奉坤成節功德疏。詔敕書。

元祐二年九月二十四日

救馮京職雖在外。忠不忘君。集勝妙之良。因致壽康
之善。禱眷言誠。盡良極歎嘉。

賜朝奉郎通判梓州趙君奭進奉坤成節無

量壽佛教書。元祐二年九月二十四日

敕趙君奭相好妙嚴衷誠傾盡汝期乃后享無量之
年吾欲斯民同極樂之世永言忠愛良用歎咨

趙州賜大遼皇帝賀興龍節大使茶藥詔元祐

二年九月
二十七日

敕隣歡載講使節甚華永言郵傳之勤遙此風霜之
候宜加寵賚以示眷存

趙州賜大遼皇帝賀興龍節副使茶藥詔元祐

二年九月
二十七日

救卿載馳遠道良苦祈寒豈無藥物之嘉以輔寢興
之節宜膺寵錫尚體至懷

神宗皇帝御容至會聖宮并應天禪院前一

日奏告 諸帝祝文

三靈眷命 六聖在天崧洛之間仙釋所館惟茲吉
禘之始當祔出游之庭念彼元臣昔皆侑食一新惟
肖之像永陪如在之神敢冀威靈曲垂昭鑒

十月初本殿夫人往永裕陵酌獻

神宗皇帝表本

雨霜墮籜感閉塞於天時收潦滌場思艱難於王業
恭惟 尊謚皇帝禹功紀地堯則惟天威加四夷尚
餘肅物之稟仁及萬彙永同挾纘之溫省奉無期瞻

懷靡極

賜熙河路副總管姚兕等銀合茶藥口宣

二年九月十四日

有敕卿以武略過人忠義思報焚蕩虜境宣明國威特示寵頒以觀來效

賜尚書左丞劉摯生日詔

元祐二年九月二十二日

敕劉摯律協應鍾辰集析木宮貝生俊輔休有令名膺我寵章以介眉壽

東坡四制集卷第四

